

28.8.2020

KENYATAAN MEDIA

oleh **DATO' IR. JASENI MAIDINSA**
CEO, PBAPP dan PBA Holdings Bhd.

BAYAR RM100J KEPADA KEDAH UNTUK PULIHARA ULU MUDA SEPENUHNYA DAN SECARA KEKAL

- **PBAPP menyokong tuntutan Kedah sebanyak RM100 juta daripada Kerajaan Persekutuan untuk memulihara 160,008 hektar hutan hujan di Ulu Muda sebagai kawasan tadahan air NCER, sepenuhnya dan secara kekal.**

PULAU PINANG, Jumaat, 28.8.2020: Perbadanan Bekalan Air Pulau Pinang Sdn Bhd (PBAPP) mengalu-alukan kesediaan Kerajaan Negeri Kedah untuk memulihara Ulu Muda sebagai kawasan tadahan air NCER dengan pampasan sebanyak RM100 juta.

Pada 27.8.2020, Menteri Besar Kedah Muhammad Sanusi Md Nor dipetik dalam laporan media menyatakan bahawa Kedah telah berunding dengan Kementerian Sumber Asli dan Air (KASA) untuk memohon pampasan RM100 juta bagi memulihara Ulu Muda sebagai kawasan tadahan air.

Kerajaan Persekutuan harus membayar tuntutan RM100 juta Kedah berdasarkan 3 syarat utama berikut:

1. Kedah bersetuju untuk mewartakan, mengkategorikan dan melindungi secara undang-undang hutan hujan 160,000 hektar di Ulu Muda sebagai "Hutan Tadahan Air", di bawah Seksyen 10A (1) Akta Perhutanan Negara;
2. Kedah bersetuju untuk memulihara dan melindungi Ulu Muda secara kekal sebagai Kawasan Tadahan Air Wilayah Ekonomi Koridor Utara (NCER); dan
3. Kedah bersetuju untuk menghentikan semua konsesi pembalakan sedia ada di Ulu Muda dan menghalang Jabatan Perhutanan Kedah daripada mengeluarkan konsesi pembalakan baharu di Ulu Muda.

Semua aktiviti pembalakan dihentikan serta-merta, dan pembalakan mesti dilarang sama sekali di Ulu Muda secara kekal.

Rasional Utama untuk Memulihara Ulu Muda

Ulu Muda adalah kawasan tadahan air terbesar di Wilayah Ekonomi Koridor Utara (NCER). Hutan hujannya seluas 160,000 hektar menadah air mentah untuk tiga negeri: Perlis, Kedah dan Pulau Pinang.

Kira-kira 70% air mentah Perlis dan 96% air mentah Kedah datangnya dari Ulu Muda. Lebih daripada 80% air mentah yang diabstrak oleh PBAPP dari Sungai Muda, di muka sauk Lahar Tiang di Pulau Pinang, setiap hari asalnya dari Ulu Muda.

Ini bermakna kesejahteraan 4.2 juta orang yang tinggal di Perlis, Kedah dan Pulau Pinang sangat bergantung kepada air mentah dari Ulu Muda.

Semua perniagaan dan aktiviti sosio ekonomi di 3 negeri NCER ini, yang menyumbang RM150.5 bilion kepada KDNK negara pada tahun 2018, juga bergantung pada air mentah dari Ulu Muda.

Sebilangan besar petani padi di Kedah, yang berfungsi sebagai “Jelapang padi Malaysia”, juga bergantung kepada air mentah dari Ulu Muda untuk tujuan pengairan.

Kejayaan projek transformasi ekonomi NCER berikut juga bergantung pada ketersediaan air mentah yang mencukupi dari Ulu Muda:

- **PERLIS:** Kawasan Perindustrian Lembah Chuping(CVIA), *Superfruits Nucleus Farm* dan *Perlis Inland Port*.
- **KEDAH:** *Kedah Rubber City, Kedah Science and Technology Park, Sidam Logistics Aerospace and Manufacturing, Taman Perindustrian Petrokimia, Kulim Hi Tech Park, perniagaan berasaskan pertanian, Special Border Economic Zone* di Bukit Kayu Hitam, Pembangunan Pulau Bunting dan Lapangan Terbang Antarabangsa Kulim.
- **PULAU PINANG:** *Manufacturing Test Engineering Hub*, Perniagaan berasaskan pertanian, pembesaran Pelabuhan Pulau Pinang dan pembesaran Lapangan Terbang Antarabangsa Pulau Pinang.

Dalam konteks ini, Ulu Muda adalah sumber sosio ekonomi NCER yang tidak dapat diganti dan sangat diperlukan.

Kesan pembalakan di Ulu Muda melampaui kehancuran alam sekitar. Tanpa air mentah yang mencukupi dari Ulu Muda, paip akan kering di Perlis, Kedah dan Pulau Pinang. Malapetaka akan menimpa sosio ekonomi, terutama pada ketika kita berjuang melawan Covid-19 dan berusaha untuk pulih dari kesan negatifnya.

Dengan banyak yang dipertaruhkan, Kerajaan Persekutuan harus mengguna kesempatan ini dengan memberi ganti rugi kepada Kedah, dan bekerjasama dengan Kedah bagi memastikan Kedah melindungi Ulu Muda – sepenuhnya dan berkekalan untuk kepentingan NCER dan rakyatnya.

Terima kasih.

Dikeluarkan oleh : Syarifah Nasywa bt Syed Feisal Barakbah
Unit Komunikasi Korporat
Tel : 04-200 6607
Email : syarifah@pba.com.my